



**Äntwert vun der Madamm Ministesch fir Gesondheet a sozial Sécherheet op d'parlamentaresch Fro n° 406 vum 29. Februar 2024 vum honorabelen Deputéierten Här Ben Polidori.**

1. Geet dës Karenzzäit, déi entsteet, fir sech bei der Krankekeess zu Lëtzebuerg a bei der Krankekeess am neie Land of- an unzemellen, op eng lëtzebuergesch oder eng europäesch Gesetzgebung zréck?

Als éischt muss erwäant ginn, datt d'Sozialversécherung an der Europäescher Unioun duerch europäesch Reglementer koordinéiert gëtt (Reglement (CE) Nr. 883/2004 iwwer d'Koordinatioun vun de Sozialversécherungssystemer an säin Applicatiounsreglement (CE) Nr. 987/2009), déi zum Zil hunn d'Sozialversécherungsrechter vu Leit déi sech an der Europäescher Unioun beweegen ze schützen. Dës Reglementer setze speziell Reegele fest fir ze bestëmme wéi ee Sozialversécherungssystem fir eng Persoun gëllt, a setzen de fundamentale Prinzip vum der Eenheet vun der gëlteger Gesetzgebung fest, no deem eng Persoun nëmme der Gesetzgebung vun engem eenzege Memberstaat ënnerleit.

Et ass wichteg ze betounen, dass et sech ëm eng Koordinatioun handelt, an d'Memberstaate bleiwen zoustänneg fir d'Grondprinzipie vun hire Sozialversécherungssystemer ze bestëmmen. Dëst ëmfaasst och déi erfuerderlech Formalitéiten déi een erfëlle muss fir vun der Sozialversécherung vun deem jeeeweilege Memberstaat ze profitéieren.

Generell ass et wichteg ze präziséieren, datt eng Ännerung vun der Residenz oder vun der Aarbechtsplaz innerhalb vun der Europäescher Unioun eng Neibewäertung vun der Kompetenz vun der Krankeversécherung no den europäesche Reglementer erfuerdert.

Eng Persoun an enger Situatioun wéi se vum honorabelen Deputéierten ugeschwat gëtt, déi Lëtzebuerg verléisst fir sech an engem anere Memberstaat ze installéieren, ass der Gesetzgebung vun deem anere Memberstaat ënnerluecht a benefisséiert vun der Krankeversécherung sou wéi et am Gesetz vun deem Memberstaat virgesinn ass.

Fir Rentner müssen déi betraffe Memberstaaten no der Ännerung vun der Residenz d'Kompetenz an der Krankeversécherung klären, well méi wéi een Zenario optriede kann, ofhängeg vum Versécherungsverlaf vum Rentner.

D'europäesch Reglementer iwwer d'Koordinatioun vun de Sozialversécherungssystemer gesi keng Waardezäit vir wat den Ufank vun enger neier Affiliatioun an engem neie Memberstaat ugeet.

D'Aschreiwungsprozeduren am neie Memberstaat hänken awer vun de Formalitéiten of, déi a senger Gesetzgebung virgesi sinn.

Dobäi kënnen, wéi schonn uewe beschriwwe gouf, Echangingen tëscht den Institutiounen vun de betraffene Staaten néideg si fir d'Rechter vun der Persoun festzeleeën. Elektronesch Echangingen tëscht den Institutiounen vun de Memberstaate vun der Europäescher Unioun goufen opgestallt (EESSI-System) an erlaben et ënner anerem, d'Prozeduren ze beschleunegen.

Schlussendlech ass et wichteg ze ënnersträichen, dass Artikel 8 vun de Statute vun der CNS d'Erhale vun de Rechter op d'Gesondheitsleeschtunge fir de lafende Mount souwéi fir déi dräi Méint dono virgesäit am Fall wou d'Affiliatioun ophält. Dëst Erhale vun de Rechter ass un d'Bedingung gebonnen, dass den Assuré riichtduerch während engem Zäitraum vu sechs Méint direkt virum ophale vun der Affiliatioun



verséchéert war. Ausserdeem ass nach eng wieder Verlängerung vun dräi méi Méint virgesinn, wann den Assuré grad krank ass. Dowéinst, esoubal d'Konditioune vum Artikel 8 vun de Statuten erfëllt sinn, halen d'Gesondheitsleeschtungen net direkt op wann den Assuré seng Affiliatioun verléiert.

2. Sollt et sech ëm eng reng lëtzebuergesch Legislatioun handelen, ass d'Regierung gewëllt, déi definitiv Ofmeldung bei der Lëtzebuergger Sécurité sociale esou laang ze verlängeren, bis déi definitiv Umeldung am neie Wunnland ofgeschloss ass?

Wéi uewen ugedeit, hunn d'Leit laut dem Artikel 8 vun de Statute vun der CNS e Recht op Gesondheitsleeschtunge fir de lafende Mount souwéi fir déi dräi Méint dono wann d'Affiliatioun opgehal huet, ënner der Bedingung dat den Assuré riichtduerch wärend engem Zäitraum vu sechs Méint direkt virum ophale vun der Affiliatioun verséchéert war.

Lëtzebuerg, den 3. Abrëll 2024

D'Ministesch fir d'Gesondheet  
a sozial Sécherheet  
(s.) Martine Deprez